

NOS hendenan SPECIAL

Lorene de Soussa:

UN DAMA ARUBIANO CU A YEGA DI OCUPA CARGONAN IMPORTANTE NA CURACAO Y HULANDA

Redacta pa : Mercedes Abdul

En conexion cu Dia Internacional di Hende Muher, diabierna 8 di Maart awor, DIARIO a invita Sra. Lorene de Soussa, pa bin den nos espacio "Nos Hendenan Special".

Lorene ta un di e damanan Arubiano cu a logra di ocupa puestonan halto tanto na Curacao, Hulanda, como Aruba, apesar cu na cuminzamento haya trabao no tabata facil pe.

Lorene de Soussa ta Director Ejecutivo y Secretaria di Directiva di Camara di Comercio. E tin dos yiu, Saskia di 16 aña di edad, y Elmer di 14, ambos ta studiando na Hulanda.

Den su tempo liber e ta sembra mata, cu ta su hobby favorito.

Pa cuminza nos conversacion cu masha orguyo y satisfaccion Lorene ta bisa "mi ta un hende di pariba di brug".

Si, pasobra el a nace na San Nicolas, na Hospital di Lago, manera hopi otro Arubianonan cu ta su contemporaneo.

El a pasa su school basico y secundario na Filomena College, unda el a slag na 1964 obteniendo su diploma di MULO.

"Temponan aya tabata un di e mehor schoolnan na San Nicolas", e ta bisa y ta agrega cu despues cu el a caba su enseñanza secundario e no a bay studia afo directamente.

"E tempo aya mayoria mucha muher despues di MULO tabata bay Hulanda pa studia. E opcionnan e tempo ey tabata pa bira maestra di school, trahador social, of maestro di huishoudschool".

Ningun di nan a atrae Lorene, pero ademas su mama a haya cu e tabata mucho hoben pa bay su so Hulanda, anto el a keda un aña na Aruba despues di MULO.

Mientras e tabata bayendo MULO el a haci ESTENO Engels School (Ingles cu Hulandes) na San Nicolas mes, y a obtene su diploma prome cu el a caba MULO.

E mesun aña el a haci un

opleiding na Formings College cu ta equivalente na e prome aña pa bira maestra di huishoudschool.

"Pa sugerencia di sra. Lidya Ecury (q.e.p.d), un gran amiga di mi mama y di mi, mi bay studia na Curacao. Mi a pidi beca di gobierno pa bay sigui studia".

A GRADUA "CUM LAUDE"

"Na Curacao mi a bay 4de cu 5de klas, mi a haci examen (M.M.S). E tempo studiantenan Arubano cu tabata bay Curacao tabata bay Inmaculata cual ta un internaat".

Na Maria Inmaculata Lyceum na Curacao, Lorene a caba su estudio secundario avanza (similar na HAVO aki na Aruba) unda el a gradua "cum laude".

"Esaki ta un di e aspectonan cu a ponemi sinti hopi honra. Mi a gradua "cum laude" y ademas como e mehor di mi klas".

Lorene ta corda cu como regalo el a haya un buki di historia di Antiyas door di Gobernador, y ora el a bolbe Aruba tambe aki el a haya un buki di historia di Aruba como estimulo.

DEN DIRECCION DI TURISMO

"Den tur e tempo ey mi a mira cual ta e posibilidad pa un futuro carera", Lorene ta bisa, agregando cu e tereno di turismo tabata hala hopi su atencion. E tempo ey tabata tin algun hotel, e.o. Basiruti y e prome hotel grandi cu tabata Aruba Caribbean cual a haci hopi impresion riba dje.

"Mi a pensa cu mi carera mester bira den turismo, algo completamente nobo e tempo ey".

Riba su mes el a busca contacto cu un school di turismo na Hulanda unda el a worde acepta y tambe a haya un beca di gobierno di Antiyas.

Lorene de Soussa a studia na "Netherlands Institute for Tour-

ism and Transport Studies (N.W.I.T) situa na Breda.

E ta corda cu ora el a yega tabata tin un Arubiano cu a yega un aña prome cune, cu ta don Rafael Estrada.

"E tabata un school nobo cu apenas dos dos aña di existencia. Aworaki el a bira un school hopi mas grandi y diversifica, cu ta conta cu mas di mil estudiante".

Lorene ta sigui splica cu tempo cu el a studia tabata tin e posibilidad di specializa den 3 direccion di Turismo: Publicitario; Comercial; y Recreativo. El a scoge pa Turismo Comercial.

"Ora mi a caba mi studio mi a skirbi mi tesis bao titulo "Oportunidadnan pa Desaroyo di Turismo Europeo pa Antiyas Hulandes".

"Ora cu mi a caba mi studio mi tabata tin den mente pa bolbe Aruba lo mas lige posible", Lorene a acentua, pero riba tereno laboral e tabata un descepcion pe ora el a bolbe su pais.

DIFICULTAD PA HAYA TRABAO

Pa Lorene tabata un descepcion grandi cu ora el a bolbe Aruba e no por a haya trabao.

"Algo cu mi no a spera, pasobra mi a scoge un ramo cu den e tempo ey tabata señala como e industria cu ta bay crece rapido y cu tin futuro.

Como cu mi a studia cu beca mi mester a bati porta di gobierno prome. Oficina di Turismo a bisami NO, nos no tin ni un vacatura; nos no por dunabo un trabao".

Lorene ta menciona acentua cu tabata tin un vacatura, pero e no a haye pa e simple hecho di ta muher.

"Tabata tin un posicion di guide V.I.P.s habri na Oficina di Turismo, pero nan di cu mi - sorry, nos no por dune un hende muher pasobra un hende muher no por keiro cu turista ni percura pa entretenimento pa nan".

Oficina di Turismo a bise flat

cu nan tabata tin mester di un homber pa asumi dicho cargo.

Pa nan e trabao tabata encera peligro pa un dama, y no tabata decente pa un muher tampoco.

"Mi mester bisa cu aworaki mi ta mira cu te hasta tin un hende muher ta hefe di e departamento ey. Pues e situacion a cambia pa lo mehor".

"Aunque mi a bolbe Aruba gradua den turismo mi a pasa den dificultad pa haya trabao. Ningun hende kier a busca un hende cu mi estudio. Mi por corda un dia cu mi tabata na cas, mi a haya un yamada di telefon. E persona ta bisami: -esaki ta Betico Croes, mi a tende cu señora ta buscando trabao-. Mi di cune si". El a mandami na cierto hotel pa mi solicita. "E di cu mi: -pasobra nan pidiendo un werkvergunning pa un stranhero y nos ta prefera pa un local tuma e trabao-. Mi a bay solicita. Mi di cu nan cu mi tin estudio y cu mi a caba di bin bek. Bo sa kico nan a contestami? -Sorry nos a dicidi cu e funcion ey nos no tine mas-", Lorene ta conta.

Lorene ta pensa cu tambe den pasado Arubianonan tabata tin dificultad pa haya trabao y e ta kere cu aunque e situacion por a drecha cu transcurso di añanan, ainda no ta suficiente.

DIFERENTE CARGO

Lorene a sigui solicita den otro hotelnan te cu el a haya su prome trabao na Divi Divi Beach Hotel, unda el a haya e puesto di Social Hostess, unda el a pasa un experiencia tremendo, specialmente pa e ideanan tras di loke e mester a haci, pa duna un bon servicio, banda di un hefe cual filosofia tabata di trata e guest na hotel mescos cu "bo ta trate den bocas". Despues di esey Lorene a traha un tempo cortico na Martijn Trade Co., pero como cu e no por a haya nada na Aruba pa desaroya su carera el a solicita na Curacao, unda el a traha na Tourist Bureau, unda el a keda 1 aña y mey na e departamento estadistica y re-



Lorene de Soussa

search. Despues el a bay bek Hulanda.

Na Hulanda el a traha como Hefe di Convention & Hotel Service Department na Rotterdam Tourist Office.

"Mientras mi tabata tey mi a worde pidi pa bolbe na Oficina di Turismo y como realmente mi tabata gusta e trabao ey mi a bay bek y despues di dos aña el a haya encargo special di gobierno di Curacao pa bay traha pa dos compania di hotel, di cual gobierno tabata accionista mayoritario".

Na aña 1978 el a casa cu un Hulandes y a tempo despues a bay biba na Hulanda, unda el a keda te 1988, aña cu el a regresa Aruba.

Na fin di 1985 Lorene a dicidi di studia Business Administration cu tabata un estudio masha popular, unda el a sigui estudio na nivel di Master Degree.

CAMARA DI COMERCIO

Lorene de Soussa tin 7 aña y mey ta trahando na Camara di Comercio den e posicion di Executive Director.

E ta hefe di un staff forma pa 12 dama, y su responsabilidad ta di maneha e operacionnan di Camara di Comercio, unda su prome obligacion ta ehecuta diferente decision gubernamental.

Tambe e ta Secretaria y Tesorero di Directiva y fuera di esaki e ta maneha e parti financiero y prepara y supervisa e presupuesto di e departamento aki.